

Sanaartornermut Ataatsimiititaliap**ISUMALIUTISSIISSUTAA****Pillugu**

Inissianik attartortitsisarneq pillugu Inatsisartut peqqussutaata § 60-ip allannguutissaanik kingusinnerpaamik UKA 19-mi saqqumiusseqqullugit Naalakkersuisut peqquneqarnissaanik inatsisartut aalajaangiiffigisassaattut siunnersuugut. Taamaalilluni attartortup toqukkut qimagunnerani utoqqat illuanulluunniit nuunnerani inoqutigiinni najugaqartut inigisaminnik anisinneqarsinnaanerannik pitsaanagerusumik illersorneqarsinnaasunngorlugit. Uani ilanngullugu § 60, imm. 2, uniffiup appaa peerneqassasoq, taamaalilluni aamma § 60, imm. 1 aamma 2 allanngortinneqassasut ukiut marluk najugaqarnissamik piumasaqaataasup qaammatinut arfinilinnut allanngortinneratigut.

(Inatsisartunut ilaasortamit Peter Olsenimit siunnersuutigineqartoq, Inuit Ataqtigiit)

Siunnersuutip aappassaaneerpeqarneranut

Sanaartornermut Ataatsimiititaliap suliarinninnermini ilaasortarai:

Inatsisartunut ilaasortaq Anders Olsen, Siumut, Siulittaasoq

Inatsisartunut ilaasortaq Peter Olsen, IA, Siulittaasup tullia

Inatsisartunut ilaasortaq Pele Broberg, Parti Naleraq

Inatsisartunut ilaasortaq Bentiaraq Ottosen, Atassut

Inatsisartunut ilaasortaq Justus Hansen, Demokraatit

UPA2019-imi ulloq 2. april siullermeerinninnerup kingorna ataatsimiititaliap siunnersuut misissorpaa.

Siunnersuutip imarisai siunertaalu

Attartortup toqukkut qimagunnerani utoqqaat illuannulluunniit nuunnerani inoqutigiinni najugaqartut attartortup inissiami attartugaani najugaqaannarsinnaanissaat siunnersuuteqartup kissatigaa.

1. Siunnersuutip Inatsisartuni siullermeerneqarnera

Partiiniit siunnersuut tapersorsorneqarpoq. Tulliuttumi allannguutissatut siunnersuummik IA saqqummiussaqqarpoq:

”Inissianik attartortitsisarneq pillugu Inatsisartut peqqussutaata § 60-ip allannguutissaanik kingusinnerpaamik UKA 19-mi saqqumiusseqqullugit Naalakkersuisut peqquneqarnissaanik inatsisartut aalajangiiffigisassaattut siunnersuut. Taamaalilluni attartortup toqkkut qimagunnerani utoqqaat illuanulluunniit nuunnerani inoqutigiinni najugaqartut inigisaminnik anisinneqarsinnaanerannik pitsaanagerusumik illersorneqarsinnaasunngorlugit.”

INI A/S-mik ataatsimeeqateqarneq

Ulloq 8. april INI A/S-mi Pisortaaneq, Henrik Rafn ataatsimeeqatigineqarpoq.

Innuttaasut ilaat mianernartumik inissisimasut ineqarnissamik qulakkeerunneqarnissaat siunnersuuteqarnikkut naatsorsuutigineqartariaqartoq Henrik Rafn oqaatigaa. Siunnersuut periaatsitigut teknikkikkullu unammillernartoqarnaviangilaq taamaattumillu inatsisissatut siunnersuutip akuersissutigineqarnerata kingorna atortussanngortinneqarsinnaalerumaarluni. Siunnersuutip atuutilersinneranut atatillugu nutaanik aningaasartuuteqartoqartariaqalernissaa aammattaaq naatsorsuutigineqanngilaq.

Henrik Rafn periarfissaq atorlugu innersuussutigaa, inissiamik attartortitsisarnermut peqqussutip § 60 isiginiarneqarneratigut, erseqqissarneqarsinnaalissasoq, siunissami qaammatit ”kingulliit” arfinillit, toqkkut qimaguttuqarnera imaluunniit utoqqaat angerlarsimaffiannut nuuttoqarnera sioqqullugu, najukkamik tiguisoqarsinnaanissaanut tunngaviulissasoq.

Saaffiginnissutit

Sanaartornermut Ataatsimiititaliattaq piariaqartissimavaa ISERIT-ip siunnersuummut isumaanik paasiniaaviginissaa. ISERIT tassunga atatillugu siunnersuutit tulliuttut nassiuppai:

”Siunnersuut pitsaaquteqarlunilu ajoqutissartaqarpoq: Inoqutigiit ajornannginnerusumik inissiamik attartukkamik tiguisinnaalernissaasa pitsaaqutigaa taamalu pisoqarneratigut pissutsit ilungersunarsinnaasut pinngitsoortinneqarsinnaallutik (ilagisaasut inissiamik annaasaqarnerat) pinngitsoortinneqassammat. Inissianik amerlanernik tiguisoqartalernerani ajoqutaasinnaasoq tassaasinnaavoq – utaqqisutut allattorsimasutut inissiamik tunineqarnatik – inissiali inunnut inoqutigiinnut nuussimasunut tunniunneqarlutik. Taamaattoqarnerasigut utaqqisut ”suli inissiameeqataalernikuunngitsunut” utaqqinerannik sivisunerulersitsisinnaasoq.

Allannguummi inoqutigiinnut allanut illersuutaassaaq pitsaasoq – taamalu taakkua ineqaannarsinnaanissaat qulakkeerreqassalluni. Killissalli qaammatinut arfiniliinnarnut appartinneqassappat, malittarisassanik atornerluisoqariataarsinnaaneraniq malitseqarsinnaavoq. Attartortup soraluaa angut, soraluaa arnaq, erneq ilaqutaasorluunniit alla kingusinnerusukkut inissiamik tigusiariartut isertertunik imaluunniit najugaqatigiilertoqartarnera ullumikkut Iserit A/S-ip suliarisareerpai. Illoqutigiinnut ilaangikkaluarlutik, allatulluunniit illoqutigiinnut inooqataangikkaluarlutik. Qaammatinut arfinilinnut sivilissusilimmut killiisoqarneratigut, attartortup ilaqutaasut attartortumi najugaqaleriataarsinnaaneraniq tamatuma kingorna ukiup affaata qaangiunneratigut inissiamik tigusiinissamik qinnuteqarsinnaapput.”

Ataatsimiititaliap siunnersuummik suliarinninnera

Ataatsimiititaliap siunnersuut misissorpaa soqutigisaqatigiinniillu assigiinngitsunik akuersaartunik tigusaqarsimavoq.

Ataatsimiititaliap maluginiarppaa, aaqqiissummik allanngortitsisoqarneratigut atornerluisoqariataartoqarsinnaalernissaa assortorneqarsinnaangitsoq, akerlianilli inuutaasunik immikkut ittumik mianernartumik inissisimasut ilungersunarnerusumut inissinnissaannut pinngitsoortinniarlugit qulakkeerinninnerussamat.

Sanaartornermut ataatsimiititaliap maluginiarppaa, attartortut ukiuni kingullerni tallimani sulisunut inissiani najugaqartut, sulisunut inissiani inigisaminnik nammineq nalinginnaasumik attartortutut tigusiinnaalernikuunerat, sulisorineqartorlu piffissaq tamaat nalinginnaasumik utaqqisut allattorsimaffianni nalinginnaasumi inissarsiorlutut allassimanissaa piunasaqaataajunnaarnikuulluni.

Siunnersuummi pisoq allaaserineqartoq tassaavoq sulisunut inissiamik nammineq tigusiinikuunngitsoq, ajutoortoq toqusorlu. Pisoq taanna inissiani attartortitsisarneq pillugu peqqussut § 60, imm. 2-mi maleruagassiunneqarpoq:

§ 60.

Attartortup toqukkut qimagunneratigut aappaasup attartugaq attartornermi atugassarititaasut atuutereersut malillugit attartornermik pisinnaatitaaffeqassaaq. Taamatuttaaq attartornermi isumaqatigiisummik atsioqataasimangitsoq, kisiannili qaammatini arfinilinni kingullerni attartortumik najugaqateqarsimasooq pisinnaatitaaffeqassaaq, kisiannili § 63 imm. 3-mi aalajangersakkat malillugit.

Imm. 2. Suliffigisamat atatillugu, attartortoq pisortat suliffeqarfiutaanni ineqartinneqarpat, apparisaasooq inigisamat attartortittakkatut nalinginnaasutut inigisamat attartornissaanut pisinnaatitaaffeqassaaq. Taamatuttaaq attartornermi isumaqatigiisummik atsioqataasimangitsoq, kisiannili qaammatini arfinilinni kingullerni attartortumik

najugaqateqarsimasoq pisinnaatitaaffeqassaaq, kisiannili § 63 imm. 3-mi aalajangersakkat malillugit.

Imm. 3. Attartortoq utoqqalinermigut napparsimalernermigulluunniit utoqqaat illuanut assigisaanulluunniit nuuttariaqassapat immikkoortuni 1-2-milu aalajangersakkat assigisaattut atuutissapput.

Inatsit atuuttoq naapertorlugu arnaq uani qimagaasup uimi suliffimminut atatillugu inissiamik attartugaanik tiguisinnaangilaq, angut arnarluunniit utaqqisut allattorsimaffianni nammineerluni nalinginnaasumi allaqqasimanngikkuni.

Ataatsimiititaliattaq maluginiarpaa:

§ 21, imm. 2-mi naapertorlugu maleruagassami allassimavoq sivikinnerpaamik ukiut tallimat sinnerlugit najugaqarsimasup inissiaq inissiatut attartortittakkatut nalinginnaasutut tigunissaanut periarfissaqartoq. Ataatsimiititaliap, naatsorsuutigisariaqarpaa ”attartortoq” uani pineqartoq tassaammat sulisorineqartoq.

§ 60, imm. 2, naapertorlugu maleruagassami allassimavoq NULIAASUP UIUSULLUUNNIIT suliffimminut atatillugu attartortup toqkkut qimagunneratigut tigunissaanut periarfissaqassasoq.

Tamanna tunngavigalugu ataatsimiititaliap kissaatigaa siunnersuut taama iluseqartillugu tapersersussallugu, siunnersuut nalinginnaasumik attartortakkanut aamma suliffimmut atatillugu inigisanut, inatsisillu suliarineqarnerani naleqqussaasoqassasoq, qaammatini kingullerni arfinilinni inooqaatigiissimanissaq taamaaliornikkut piumasqaataasussanngorlugu.

Taamatuttaaq inissianik attartortitsisarneq pillugu peqqussut § 60, imm. 2 aamma utaqqisut allattorsimaffianni nalinginnaasumi allaqqasimanissaq piumasqaataasooq peerneqartoq aappaasup suliffimmut atatillugu ”inigisaanut” kingornussinissamut ataatsimiititaliap piumasqaatigaa.

Siunnersuutip aningaasatigut kingunerisassai

Aalajangiiffigisassatut siunnersuutip piviusunngortinneqarnerani aningaasaqarnikkut allaffissornikkullu kingunerisassai siunnersuummi tunngavilersuutigineqarnissaat Inatsisartut suleriaasianni § 33, imm. 3-mi allassimavoq

Tamanna naapertorlugu siunnersuutigineqartup piviusunnngortinnissaanut siunnersuut aningaasatigut kingunerisinnaasai allassimasut ataatsimiititaliap maluginiarpaa, Taamaaliornikkut inissianik attartortitsisarnermi pillugu Inatsisartut peqqussutaannik, nutserinermik il.il. inatsisissatut siunnersuummik suliaqarnermi aningaasartuutit inuup ataatsip ukiup affaanut suliaasai qaangerlugit suliaannnginnissaa naatsorsuutigineqarpoq.

Apequtigineqartoq sukumiinerusumik eqqaaneqarsimangitsoq Naalakkersuisut akissuteqataanni takuneqarsinnaavoq, taamaattumik Sanaartornermut Ataatsimiititaliaq allatut naliliinissamut tunngavissaqarsorinngilaq.

Ataatsimiititaliap inassuteqaatai

Sanaartornermut ataatsimiititaliap isumaqatigiittup siunnersuut pillugu oqaatigissavaa:


Inissianik attartortitsisarneq pillugu peqqussut § 60-ip allannngortinneqarnissaanut qulakkeerneqartariaqarpoq, siunissami inissiamik attartortittakkamik tigusinissamut akuersisoqarnissaanut qaammatit arfinillit kingulliit tunngaviussammata. Peqatigisaanik utaqqisutut allattorsimaffimmi allassimanissamik piumasaqaatigineqartoq peerneqassaaq, § 21-mi siusinnerusukkut soorlu taama pisoqareersimasoq.

Inissianik attartortitsisarneq pillugu peqqussutip allangortinneqarnissaa pillugu inatsisissatut siunnersuummik saqqummiussaqaarnissaq pillugu siusinnerusukkut aalajangiinerit malitseqartitsisoqarnissaanik Sanaartornermut Ataatsimiititaliamit tamatumunnga atatillugu Naalakkersuisut kaammattorpai.

Tamanna tunngavigalugu Sanaartornermut Ataatsimiititaliap siuliani allassimasunut paasinnilluni siunnersuut Inatsisartunit akuerineqartussanngortippaa.



Taamatut oqaaseqarluta isumaliutississummilu paasinninnsinnik allatarput tunngavigalugu Ataatsimiititaliap siunnersuutip aappaassaarneqarnissaanut tunniuppa.

Siunnersuutip taama iluseqarluni Inatsisartunit akuerineqarnissaa Sanaartornermut Ataatsimiititaliap isumaqatigiittup inassutigaa.



Anders Olsen, Siulittaasoq

Peter Olsen



Pele Broberg



Justus Hansen